



Justus Hansen, Demokraatit
Inatsisartuni ilaasortaq
/Maani

Unammilleqatigiinnerup ammaanneqarnissaa pillugu § 37 naapertorlugu apeqqut nr. 2016-242-mut akissut

Brevdato: 04-10-2016
Sags nr. 2016-14280
Dok. nr. 13673827

Aallarniutigalugu suliassaqaarfimmut apeqqutitit soqutiginninnerillu pillugit qutsavigaakkit. Apeqqutitit matuma kinguliani akineqarpoq. Ilisimatitsissutit oqaatigineqassaaq, akissuteqarnissamut Nalunaarasuartaateqarnermut Aqutsisoqarfimmut isumassarsiorfissanik pissarsiniartoqarsimammat.

Postboks 909
3900 Nuuk
Tlf.: (+299) 34 50 00
Fax: (+299) 32 52 86
E-mail: isan@nanoq.gl
www.naalakkersuisut.gl

1. Internet-mut niuerneq unammilleqatigiinnerup eqqutereerneraniit qanoq allangortigaa?

Kalaallit Nunaanni internettikkut sullissinissamut neqerooruteqartarnermi niuerfiit ukiuni kingullerni pitsaasumik ineriartorsimapput.

Naalakkersuisut 2009-mi septembarimi aalajangerput, attaveqaatinik ledningeqanngitsunik aammalu attaveqaatit ledningeqanngitsut aqutugalugit internetimik niueruteqarnerit ammaanniarlugit. 2012-imi Nalunaarasuartaateqarnermut Aqutsisoqarfik Islandimiit Canadamiillu immap naqqatigut kabelit pisinnaasaannut akinik aalajangiivoq, tamatumalu kingunitsianngua kabelit pisinnaasaanni pisinissamut isumaqatigiissut siulleq atsiorneqarpoq.

TELE-POST-ip 2013-ip aallartinnerani Nuummi Qaqortumilu flatrate-mut tunisassiat tuninialerpai, tamatumalu kingunerisaanik immap naqqatigut kabelit pisinnaasaannik atuineq annertuserujussuarpoq. Immap naqqatigut kabelip pisinnaasaanik atuinerup annertuserujussuarnerata kingunerisaanik, pisinnaasanut akit apparteqqinneqarsinnaasimapput, tamatumalu aamma kingunerisaanik pisinnaasat piumaneqarnerat annertuseqqissimalluni.

Islandimut aamma Canadamut immap naqqatigut kabelit pisinnaasaannut akit appariartornerisa kingunerisaannik, illoqarfinnut nunaqarfinnullu, radiokæde pingarneq aqutugalugu immap naqqatigut kabelinut atassusersimasunut internettikkut sullissinernik tunisassiornermut aningaasartuutit ikiliartorsimapput. Sumiiffinni taakkunani atuisut inuussutissarsiornermillu ingerlataqartut tunisassiat pitsaanerulerneru akillu apparneri misigaat.

2016 tikillugu sullissisut nutaat pingaartumik inuussutissarsiorturnut niueruteqarneq unammillerfigisimavaat. 2016-imi sullissisunit nutaanit taakkunannga marluk tunisassiaminnik atuisunut neqerooruteqartalerput. Internetikkut sullissinerit unammillerfiusut neqeroorutigineqarnerat Kalaallit Nunaanni illoqarfinnut nunaqarfinnillu

aralinnut siammarsimapput, taamaalillunilu sullitat internetimik sullissinerni pilersuisut akornanni toqqaasinnaanerat qulakkeerneqarsimalluni.

2. Internet-kut unammilleqatigiinnerup kinguneranit avinngarusimasut eqqugaanerlutik?

Unammilleqatigiinnerup ammaanqarnerani internetikkut sullissinerit qaffasissusiat ajorseriansimanngilaq.

Unammilleqatigiinnerup ammaanqarnerata kingunerisaanik, isorliunerusuni innuttaasut suliffeqarfiillu akit qaffannerinik imaluunniit tunisassiat ajornerulernerinik kinguneqannginnissaata qulakkeerneqarnissaa Naalakkersuisunut pingaaruteqarsimavoq.

3. Tele-kut kiffartuussinerit unammilleqatigiinnerup kingunerinik avinngarusimasunut pilersuisussaataanerup aqqanik nalimmassarneqarsinnaanerlutik?

Nalunaarasuartaateqarnermi sullissinerni unammilleqatigiinnikkut ammaassiviusuni tuniakkalik pilersuinermi pisussaataasussamik toqqaanissamut Naalakkersuisut piginnaatitaapput. Tuniakkalik pilersuinermi pisussaataasumik toqqaanermut atatillugu aamma pilersuinermi pisussaaffeqarnermut maleruagassanik sukumiisunik aalajangersaasoqarsinnaavoq, taakkunungalu sullissinerit pilersuinermi pisussaataaffiusut atuunnerat, atortui akinillu aalajangersaasarnerit ilaapput.

Tamatuma kingunerisaani Attaveqaqatigiinnermut Naalakkersuisoq pilersuinermi pisussaataaffeqarnermik aalajangersaanermi isorliunerusunut kingunerluutaasinnaasunut pinngitsoortitsiniarluni suliniuteqarsinnaavoq.

4. Attaveqaatitigut tele-kkullu kiffartuussinerit siammaannerisigut Tele Greenland-mut pisussaaffiliisinnaanarluni suliamik pingaarnersiuinissamut, taamaasilluni asuli nalimmassaanerit pinngitsoortinneqarlutik?

TELE-POST-ip naatsorsuutitigut avinneqarnissaannik Naalakkersuisut aalajangerput, tamatumanilu ingerlatseqatigiiffimmi niuerfiit assigiinngitsut paasiuminarnerulernissaat qulakkeerniarneqarpoq.

TELE-POST-ip naatsorsuutitigut avinneqarnera, nalunaarasuartaateqarnermut peqqussummi siunnerfigineqartutut niuerfiit akornanni sunniuteqartussaangitsumik naammaginatsumik qulakkeeriffiusinnaangippat, ingerlatseqatigiiffiup avinneqarnissaa, taamaalillunilu attaveqaatit aamma nalunaarasuartaatitigut sullissinerit

avissaartinneqarnissaat naapertuunnersoq Naalakkersuisut eqqarsaatigisinnaavaat.

Neriuppunga matumani apeqqutitit akisimassallugit.

Inussiarnersumik inuulluaqqusillunga



Knud Kristiansen